

## **ONG no indivíduu sira ható'o petisaun atu Rejeita Alterasaun Dekretu-Lei kona-ba Kurríkulu Nasionál Pre-eskolár (PE) no Ensinu Báziku (EB)**

Iha loron 9 fulan-abril 2018, Rede Advokasia ba Edukasaun haruka petisaun ba Prezidente Repúblika, Bankada partidu polítiku hotu no Dioseze Dili ne'ebé deklara sira rejeita alterasaun ba kurríkulu PE no EB ne'ebé hetan promulga iha fulan anteriór. Petisaun hetan asinatura husi indivíduu atus ida resin husi organizaun naun-governmentál (ONG) rua-nulu-resin-lima, inklui FONGTIL, Fokupers, Fundasaun Alola, Asosiasaun HAK, La'ó Hamutuk, HASATIL, Permatil, ADTL, RHTO, LABEH, MOFFE-TL, ACBIT, AJAR, Fundasaun Balos, nst. Iha kraik ne'e mak versaun badak konteúdu petisaun nian:

Ami nu'udar ONG sira no nu'udar inan-aman ka família husi labarik sira iha eskola pre-eskolár no ensin u báziku, lee no analiza alterasaun Dekretu-Lei rua<sup>1</sup> kona-ba kurríkulu pre-eskolár no ensin u báziku síkulu 1 no 2 no rejeita alterasaun Dekretu-Lei rua ne'e. Ami hakarak haree kontinuasaun ba implementasaun kurríkulu 2015 to'o bele avalia duni ninia rezultadu, hafoin halo revizaun. Ami koñese di'ak kurríkulu 2015 nian, no kontente ho ninia kualidade konteúdu no pedagojia ne'ebé hanorin lian rua ofisiál iha maneira ne'ebé rekoñese realidade lian iha rai laran no metodolojia ne'ebé bazeia ba estudu barak no bele efetivu atu atinje rezultadu di'ak.

Tuir ami-nia monitorizasaun, maioria boot husi manorin sira hakarak kontinua ho kurríkulu 2015 no prezisa de'it mak suporta ho materiál, formasaun no infrastrutura atubele implementa ho di'ak. Mudansa boot iha tempu la to'o tinan 3 husi tempu hahú implementa kurríkulu, sedu liu no fó impaktu negativu ba prosesu aprendizajen. Nune'e, ami ezije apresiasaun parlamentár ba lei sira-ne'e, ne'ebé ita-nia Konstituisaun garante.

Ami rejeita alterasaun ho razaun tuirmai ne'e:

1. **Alterasaun sira halo ho prosesu ida la hó baze tékniku, no la transparente.** Prosesu halo alterasaun sira-ne'e lalais liu no la bazeia ba rezultadu avaliasaun ho baze sientífiku kona-ba kurríkulu 2015 nian. Prosesu la inklui konsultasaun no la transparente; ne'e hatudu polítiku sira la rekoñese esforsu boot husi komidade ne'ebé kontribui ba prosesu elaborasaun kurríkulu 2015 nian.
2. **Alterasaun sira hatudu inkonsisténsia grave kona-ba métodu hanorin no uza lian rua ofisiál.** Lei foun kurríkulu EB nian la determina métodu klaru ida atu hanorin literasia no ba lian instrusaun. Tuir Konstituisaun RDTL Artigu 13, tenke valoriza no dezenvolve lia-tetun, maibé alterasaun sira la halo ne'e. Kurríkulu 2015 fó dalan atu dezenvolve duni lia-tetun no hanorin estudante sira atubele hetan base forte iha lian rua ofisiál.

---

<sup>1</sup> Lei orijinál sira mak No3/2015 no Dekretu-Lei No 4/2015, no alterasaun sira sai ona iha *Jornal da República* nu'udar Dekretu-Lei No 3/2018 no Dekretu-Lei No 4/2018.

3. **Alterasaun sira iha pre-eskolár la realístiku no la rekoñese importánsia dezentvolvimentu liuhosi halimar.** Tanba alterasaun aumenta oras mínimu ba pre-eskolár, labarik barak sei labele hetan oportunidade tama pre-eskolár tanba manorin no facilidade sira limitadu tebes. Alterasaun mós ezije rezultadu ba labarik sira iha pre-eskolár atu hetan literasia (hatene lee no hakerek) ho baze solidu iha lian rua ofisiál. Rezultadu edukativu ne'e la apropriadu duni ba idade pre-eskolár. Alterasaun mós hatún importánsia ba aprende liuhosi halimar no metodolojia sentradu ba alunu ne'ebé ita hatene efektivu tebes ba idade ne'e.
4. **Alterasaun kontra prinsípiu edukasaun inkluzivu.** Iha alterasaun ba lei rua ne'e, determina katak manorin sira tenke “referenciar” estudante sira ho nesesidade edukativu espesiál ba “*centro de recursos*”. Ida-ne'e signifika katak ita hakat fali ba kotuk ba hanoin koloniál kona-ba estudante ho defisiénsia. Alterasaun ne'e la refleta ona objetivu edukasaun inkluzivu nian no ninia prioridade dahuluk: identifika maneira hotu atu inklui estudante sira iha prosesu ensinu-aprendizajen baibain envezde filafali ba toman uluk nian atu hakarak haruka estudante sira ho defisiénsia ruma ba fatin dook no ‘espesiál’, hodi haketak sira hosi labarik sira seluk.
5. **Alterasaun sira hatudu falta kompriensaun mínimu konseitu báziku edukasaun nian no nakonu ho inkonsisténsia sei kontribui ba konfuzaun iha prosesu ensinu-aprendizajen.** Karik tanba iha intensaun atu halo alterasaun lailais hamutuk ho falta análize kle'an, ami bele identifika ho hakfodak katak alterasaun sira hatudu ho momoos falta koñesimentu ba konseitu báziku husi edukasaun, hanesan falta kompriensaun kona-ba liafuan ‘literasia’ no metodolojia hanorin lian ne'ebé temi iha leten.
6. **Alterasaun hatún autonomia husi eskola sira hotu, liuliu eskola Katóliku no privadu sira.** Iha lejjlasaun 2018 nian laiha opsaun atu eskola sira – menus eskola “*imersão lingua portuguesa*” - bele halo troka ba kurríkulu no hatodan burokrasia bainhira eskola hakarak aumenta kurríkulu. Ne'e bele fó impaktu negativu boot ba eskola barak inklui eskola Katólíka, eskola internasionál no eskola ne'ebé uza lian jestuál ka alfabetu Braille.
7. **Alterasaun sira halakon possibilidade atu uza materiál lubuk ida di'ak no kualidade, ne'ebé dezentvolve liuhosi prosesu naruk, karu no inkluzivu.** Materiál sira hanesan Livru Planu Lisaun (ba manorin sira) no livru didátika sira ba estudante sira la apár ho alterasaun sira. Ami haree seidauk hetan fahe, to'o armazén Ministériu Edukasaun no Kultura mak nakonu livru husi Kurríkulu 2015. Livru sira sei uza ka lae? Materiál foun iha ona ka lae? Livru sira-ne'ebé seidauk fahe, ami sosiedade sivíl mós envolve barak iha sira-nia preparasaun. Nune'e insultu boot ba ami, no ba Timoroan sira hotu ne'ebé envolve iha sira-nia preparasaun. Ne'e mós viola ita-nia oan sira-nia direitu edukasaun, tanba labarik sira hotu iha direitu atu hetan livru. Keta la fahe ho intensaun polítiku atu hamonu Kurríkulu 2015. Gastu orsamentu boot uza ona ba dezentvolve, elabora, imprime no distribui (balun distribui ona) materiál eskolár durante tinan 3 nia laran. Bainhira la uza livru sira-ne'ebé dezentvolve, la valoriza no la konsidera - gastu saugati de'it.